

unzepassen an da souwuel etabliert Kënschtler wéi och jonk Kënschtler am jeeweilege Stadium vun hirer Karriär opzefänken an ze begleeden a verschidde Prozeduren an Ofleef ze vereinfachen.

Ech gi lo net nach eng Kéier op den Detail vun all deene Mesuren an. Ech mengen, Dir hutt dat alleguerte gemaach, an den Haaptdege war wierklech, dass mer géifen deenen aktuelle Konditiounen Rechnung droen, dass mer den Alterskonditiounen géife Rechnung droen, dass mer och méi eng grouss Flexibilitéit géifen erabréngen an eeben och bei den Intermittenten déi Aktivitéiten, déi nach niewendru gemaach ginn, méi en compte huelen.

A Madamm Oberweis, ech si ganz mat Iech d'accord, dat hei ass net d'Fundament oder et soll net d'Fundament si vun der Remuneratioun vun engem Kënschtler zu Lëtzebuerg. Mir mussen alles drusetzen, all zesummen, dass se uerdentlech bezuelt gi fir déi reell Aarbecht, déi se maachen, dat heescht, wa se en Optrëtt hunn, wa se e Wierk verkafen, wa se eng Ausstellung hunn, dass do eng Remuneratioun hannendrunhänkt. Dat ass am Moment net bindend, dat stëmmt, mee dat wësst Der och, mir hunn e Code de déontologie ausgeschafft, mat deem mer eis konventionéiert Strukturen encouragéieren, sech deenen Tarifieren unzepassen. An et gëtt d'ailleurs net nëmmen dee vun der ASPRO, mir sinn och an den Diskussiounen, fir dat dote och bei deenen anere Secteure virzegesinn.

Dat ass dann och en Deel vun dem Ausbléck op d'Zukunft. Et geet weider drëm, d'Artisten zu Lëtzebuerg ze stäerken, hir Aarbechtskonditiounen op allen Niveaue ze verbesseren a wierklech ze maachen, dass si esou onofhängeg wéi méiglech kënnen schaffen.

Erlaabt mer just – et ass och ugeklongen, mee et ass wierklech eppes, wat Iech vläicht net all bewosst ass, wann Der net am Alldag domat ze dinn hutt –, deene Leit Merci ze soen, déi am Service de l'orientation et de soutien pour artistes professionnels et intermittents du spectacle am Kulturministère schaffen, well si a ganz enkem Austausch mat dem Milieu sinn, well se op all Fro kënnen äntweren, sief et beim Ausfëlle vun deene faméis Formulare, sief et, wa soss aner Froe sinn, eeben och zu der Interpretatioun vum Text. Dat ass esou eng wäertvoll Aarbecht, déi do vun net ville Leit gemaach gëtt, an dat ass wierklech extreem, extreem wichteg a virbildlech!

Mir sinn och amgaangen, eebe fir déi Vermëttlung vun deem, wat alles existéiert, e Guide pratique auszeschaffen, sou wéi mer dat och beim Gesetz vum Patrimoine kulturel gemaach hunn, fir dass ee wierklech genau ka retracéieren, wat ee muss maachen, wann een dann Demanden ausfëllt. Dat ass einfach elementar, an natierlech och dann déi technesch Ëmsetzung vum digitale Carnet.

Ech sinn awer och ganz frou – an domat halen ech dann op –, op d'Kompetenzen an d'Erfahrung vun der berodender Kommissioun kënnen zréckzegräifen, déi all Demande eenzel am Detail préift, déi dat mat enger ganz grousser Empathie mécht par rapport zu den Artisten. Ech hu viru Kuerzem dem scheidende President, dem Marc Limpach, villmools Merci gesot fir säin Asaz. Ech widderhuelen dat elo nach eng Kéier hei, an en ass elo ofgeléist gi vun engem anere Marc, vun engem anere Schauspiller, deen Dir alleguerte gutt kennt, dem Marc Baum. Voilà.

Merci.

**Plusieurs voix** | Très bien!

**M. Mars Di Bartolomeo**, Président de séance | Merci och der Madamm Minister.

Mir géifen dann zur Ofstëmmung iwwergoen.

### **Vote sur l'ensemble du projet de loi 7920 et dispense du second vote constitutionnel**

D'Ofstëmmung fänkt un. Fir d'éischt déi perséinlech Stëmmen. D'Procuratiounen. An d'Ofstëmmung ass elo eriwuer.

D'Resultat ass: 60-mol Jo, Eestëmmegkeet.

*Ont voté oui: Mmes Diane Adehm, Nancy Arendt épouse Kemp (par M. Laurent Mosar), MM. Emile Eicher, Félix Eischen (par M. Max Hengel), Paul Galles (par Mme Diane Adehm), Léon Gloden, Jean Marie Halsdorf, Mme Martine Hansen, MM. Max Hengel, Aly Kaes, Marc Lies, Mme Elisabeth Margue, M. Georges Mischo, Mme Octavie Modert, MM. Laurent Mosar, Gilles Roth, Jean-Paul Schaaf, Marc Spautz, Serge Wilmes, Claude Wiseler (par Mme Martine Hansen) et Michel Wolter ;*

*MM. Guy Arendt, André Bauler, Gilles Baum, Mme Simone Beissel, MM. Frank Colabianchi, Fernand Etgen (par M. André Bauler), Gusti Graas, Max Hahn, Mme Carole Hartmann, MM. Pim Knapp (par M. Gusti Graas), Claude Lamberty et Mme Lydie Polfer ;*

*Mme Simone Asselborn-Bintz, M. Dan Biancalana (par M. Yves Cruchten), Mmes Tess Burton, Francine Closener (par Mme Simone Asselborn-Bintz), MM. Yves Cruchten, Mars Di Bartolomeo, Mme Cécile Hemmen, M. Dan Kersch, Mme Lydia Mutsch et M. Carlo Weber ;*

*Mme Semiray Ahmedova, M. François Benoy, Mmes Djuna Bernard, Stéphanie Empain, Chantal Gary, M. Marc Hansen, Mme Josée Lorsché, M. Charles Margue et Mme Jessie Thill ;*

*MM. Jeff Engelen, Fernand Kartheiser, Fred Keup et Roy Reding (par M. Fernand Kartheiser) ;*

*MM. Sven Clement (par M. Marc Goergen) et Marc Goergen ;*

*Mmes Myriam Cecchetti et Nathalie Oberweis.*

Ass d'Chamber bereet, d'Dispens vum zweete Vott ze froen?

(Assentiment)

Merci villmools. Dann ass dat esou decidéiert.

### **13. 7948 – Projet de loi portant institution d'un congé culturel et modification :**

**1° du Code du travail ;**

**2° de la loi modifiée du 16 avril 1979 fixant le statut général des fonctionnaires de l'État ;**

**3° de la loi modifiée du 24 décembre 1985 fixant le statut général des fonctionnaires communaux**

Mir géifen zum nächste Projet iwwergoen, dem Projet de loi 7948. De Projet betrëfft d'Neiaféierung respektiv d'Ergänzung vum Congé culturel. An d'Rapportrice ass d'Madamm Josée Lorsché.

#### **Rapport de la Commission de la Culture**

**Mme Josée Lorsché** (déi grëng), rapportrice | Merci, Här President. Dir Dammen an Dir Hären, mat deem drëtten Projet de loi am Beräich vun der Kultur, deen den 13. Januar 2022 vun der Kulturministesch Sam Tanson deposéiert ginn ass, komme mer enger laangjäreger Fuerderung vum Kultursecteur no.

Konkreet geet et drëms, de Congé culturel, deen am Juli 2014 ofgeschafft gi war, nees anzeféieren an d'Konditiounen, fir an de Genoss vun deem Congé ze kommen, ze erweideren. Um eigentlechen Objektiv ännert sech näischt par rapport zum Gesetz vun 1994. Dir wësst: Et war geduecht, fir d'Professionaliséierung am Secteur weiderzedreiwen an de Besoin vum Secteur besser gerecht ze ginn.

Dat werft natierlech d'Fro op, firwat d'Gesetz vun 1994 iwwerhaupt ofgeschafft ginn ass. De Grond vun där Decisioun louch deemools virun allem doran, dass dat Gesetz säin Zil net genügend erfëllt huet. Am Zäitraum tëscht 1995 an 2014 goufen zwar 1.401 Demandé fir e Congé culturel agereecht, allerdéngs ware laut den deemolege Bestëmmungen nëmmen 902 Demandé recevabel. Am Kader vun de Spuermoossname vun 2014 gouf d'Gesetz, wéi gesot, abrogéiert, wat verständigeweis awer zu enger gréisserer Onzefriddenheet am Kultursecteur gefouert huet.

D'Iddi, de Congé culturel ënner neie Konditiounen nees anzeféieren an en auszedeeenen, fir de reelle Besoin vum Secteur effektiv gerecht ze ginn, huet sech doropshin am Kader vum Kulturentwécklungsplang konkretiséiert. Wéi Der wësst huet dëse Plang, en ass virdu schonn e puermol genannt ginn, ofgekierzt KEP, am Joer 2018 als partizipative Prozess ugefaangen an e leeft bis zum Joer 2028, dëst mam Zil, de Kultursecteur ze consultéieren, d'Acteure méi staark an d'Decisiounen anzebannen an de Recommandatiounen vum KEP bei den Decisiounen méiglechst Rechnung ze droen. Beschit Beispill liwwert dann och dëse Projet de loi, deen aus der Recommandatioun 28 vum KEP ervirgeet.

Esouvill zu der Geschicht an zu der Theorie. Ech kommen zu der Praxis an zu den Dispositiounen vun dësem Projet de loi. An der Praxis besteet eng vun de gréissten Ännerunge par rapport zum Gesetz vun 1994 doran, dass de Congé culturel net méi just vun de Kulturschafende selwer an Usproch geholl ka ginn, mee vun zwou weidere Persounengruppen. Dobäi handelt et sech éischters ëm déi Eierenamtlech, déi an enger Federatioun, engem nationalen Netzwierk oder engem Veräin aus dem Kultursecteur aktiv sinn an zum gudden Fonctionnement vun deene Gremie bäidroen. Zweetens handelt et sech bei den zousätzlechen Gruppen ëm benevöll Persounen, déi nominéiert ginn, fir un auslännesche Kulturevenementer deelzehuelen an eng Tâche do iwwerhuelen.

D'Recht op Congé culturel gëllt souwuel am öffentlechen wéi och am Privatsecteur an donieft och fir Fräiberufler, deenen hir Aarbechtsplaz zu Lëtzebuerg ugesidelt ass. D'Konditiounen, déi erfëllt musse ginn, fir an de Genoss vum Congé culturel ze kommen, si ganz villfälteg a bestinn, am Resümee, aus follgende Punkten: Den Demandeur muss zanter mindestens sechs Méint zu Lëtzebuerg sozialverséichert sinn an e längert an noweisbaart Engagement am Kultursecteur opweisen. E muss enger berufflecher Aktivitéit an eisem Land nogoen, déi näischt mat sengem accessoirë kulturellen Engagement ze dinn huet.

Hei wëlt ech nach preziséieren – dat ass eng Fro, déi an der Kommissioun oft gestallt ginn ass –, dass Persounen, déi zwar e kulturelle Beruff ausüben, mee net als professionell Kënschtler fir sech selwer schaffen, och d'Recht op Congé culturel zougestane kréien. Dat heescht beispillsweis, dass eng Persoun, déi vum Beruff hier Musek, Konscht oder Art dramatique enseignéiert, och d'Recht op Congé culturel huet, wann hiert Engagement bei enger Manifestatioun net a Relatioun zu hirem eigentlechen Beruff steet.

Bei de Salaréie gëllt doriwwer eraus d'Konditioun, dass se zanter mindestens sechs Méint vun hirem Employeur ugestallt musse sinn, fir vum Congé culturel kënnen ze profitéieren.

Dësen zielt dann och net nëmme fir kulturell Manifestatiounen zu Lëtzebuerg an am Ausland, en zielt och fir relevant Weiderbildung respektiv fir organisatoresch an administrativ Tâchen, déi fir de Weiderbestand vun enger kultureller Organisatioun entscheedend sinn.

A puncto Zuel vun Deeg, déi enger Persoun oder enger Federatioun zur Verfügung gestallt kënnen ginn, gëlle folgend Dispositiounen: Kulturschaffender kënnen bis zu zielef Deeg am Joer vun engem Congé culturel profitéieren. Benevoller vun enger Federatioun, déi ënner Dausend Memberen huet, kréien d'Recht op fënnf Deeg Congé culturel am Joer. Bei Federatiounen mat iwwer Dausend Memberen klëmmt de Congé culturel op zéng Deeg am Joer. Wat déi Benevoll aus Veräiner an Associatiounen ugeet, sou zielen zwee Deeg am Joer, wann d'Zuel vun de Memberen ënner 50 läit. Se leie bei dräi Deeg am Joer, wann d'Memberzuel tëscht 50 an 200 Memberen läit, a bei véier Deeg bei iwwer 200 Memberen. D'Federatiounen hunn an deem Kontext och d'Recht, e Contingent vu 50 Deeg ënnert hire Memberen opzedeelen, während d'Associatiounen a Veräiner e Contingent vun zéng Deeg zegutt hunn.

Wat déi zäitlech festgeluecht Limitten ugeet, bleift nach ze soen, dass Ausnahmen accordéiert kënnen ginn, dës op Basis vun enger schrëftlech motivéierter Demande.

Fir ze garantéieren dann, dass de Congé culturel och wirklech do ukënnt, wou e gebraucht gëtt, gëtt eng berodend Kommissioun agesat, déi iwwert d'Demande befëhnt. De Congé culturel gëllt am Normalfall fir zwee Deeg um Stéck, et sief, et géif sech ëm eng kohärent Serie vun Aktivitéiten handeln, fir déi jeeeweils ëmmer nëmmen een Dag gebraucht gëtt. An dann, fir sécherzestellen, dass de Congé culturel och zum richtigen Zweck genotzt ginn ass, muss all Beneficiaire, wann en ofgeschloss ass, e Rapport iwwer seng Participatioun um Evenement areeche.

Bei de Salariéen ass et doriwwer eraus esou, dass den Employeur am Virfeld no sengem Avis gefrot gëtt, vu dass de Fonctionnement vun engem Betrieb, enger Verwaltung oder engem Service public staark ënnert der Ofwieseneheet vun engem Salarié, engem Ugestallte ka leide respektiv zum Stëllstand ka kommen. An deem Fall kann de Congé culturel och refuséiert ginn.

Wat dann d'Eligibilitéit vun de Kulturschaffenden ugeet, ass festgehalen ginn, dass dës Persounen en noweisbaren Engagement, am Text steet en „engagement notoire“, an der Lëtzebuerger Kultur- a Konschteen opweise mussen, an zwar doduerch, dass hir Wierker ëffentlech diffuséiert ginn, dass hir Aktivitéit eng Retombée am Lëtzebuerger Kultur- a Konschtessektor huet an dass se eng Unerkennung am Secteur genéissen.

Doriwwer eraus gesäit de finalen Text vum Projet de loi och d'Älscht vun deenen Typen vun Evenementer vir, déi als „manifestation culturelle de haut niveau“ agestuft ginn an op déi d'Demandeurs vum Congé culturel invitéiert musse ginn, fir vum Congé culturel dierfen ze profitéieren.

Dës leschte Punkt war e wichteg Uleies vum Staatsrot, deem säin éischten Avis vum 28. Juni 2022 staamt an op deem ech kuerz wëilt agoen, well e war net kleng. Am Kader vun enger Opposition formelle um initialen Text huet déi héich Kierperschaft nämlech drop bestanen, déi sougenannt „manifestations culturelles de haut niveau“ méi kloer ze preziséieren grad wéi och déi kulturell Aktivitéiten, déi domat verbonne sinn. Mat de genannten Ergänzungen hu mir den Text an der Kommissioun – an op Propos vum Kulturministère – verbessert a mat de gefrote Präzisierungen ergänzt.

Weiderhin huet de Staatsrot drop higewisen, dass all Dispositioun, déi mat engem Congé verbonnen ass, net innerhalb vun engem Règlement grand-ducal gereegelt dierf ginn, mee an e Gesetz muss fléissen, vu dass et sech beim Congé, bei allen Zorte Congé, ëm

eng Matière réservée à la loi handelt. Och dee Punkt gouf Ulass zu enger Opposition formelle, déi mer duerch eng Modifikatioun vum Text beheween hunn. An en anere wichtige Punkt war fir de Staatsrot, dass beim Octroi vum Congé culturel keen Ënnerschied tëscht Wochendeeg a Weekender gemaach dierf ginn, dës fir dem Prinzip vum der Égalité de traitement gerecht ze ginn.

Nieft dem Staatsrot sengem Avis koum och en Avis vun der Chambre des Salariés. D'CSL huet de Projet de loi generell begréisst, mat allerdéngs enger Rei Remarken iwwert d'Modalitéiten, déi et ze respektéieren gëllt.

D'Chambre des Fonctionnaires et Employés publics huet d'Neesaféierung vum Congé culturel explizit begréisst. Donieft war dës Berufskummer der Meinung, dass de Congé culturel ni hätt dierfen ofgeschafft ginn; ech mengen, där Leit waren der méi. A schlussendlech huet si sech fir d'Erweiterung op sämtlech kulturell engagéiert Mënschen a kulturell Manifestatiounen ausgeschwat.

Weider Avise koume vum Syvicol, vun der Chambre de Commerce a vun der Chambre des Métiers. An deenen dräi Avisen ass no Präzisierungen verlaangt ginn, déi zum Deel och schonn am Avis vum Staatsrot thematiséiert gi waren a souwäit wéi méiglech an de Projet de loi agefloss sinn.

Fir méi Detailler zu deene verschiddenen Avisen an zu den Dispositiounen vum dësem Projet de loi, déi ech nach net all genannt hunn, verweisen ech op mäi schrëftleche Rapport. Et bleift nach ze soen, dass mäi Rapport den 1. Dezember 2022 no enger Rei Sëtzungen an der Kommissioun eestëmmege ugeholl ginn ass. Wéi gesot, dat weist op e grouse Konsens nach eng Kéier hin, op alle Bänken ass dës Projet och ënnerstëtzt ginn.

Jiddwerfalls begréissen ech och am Numm vun der grénger Fraktioun, dass mer hei nees e gudde Schrëtt no vir maachen, fir de Kultursektor ze stäerken an him méi Rechter zouzestoen. An domat ginn ech och direkt den Accord.

Dann awer och e grouse Merci un d'Madamm Closener, déi och dës Kéier voll derbäi war, fir eis als Sekretärin vun der Kommissioun ze ënnerstëtzen, an awer och u jiddwereen, dee sech un der Ausarbeitung vum dësem fir d'Kulturzeen wichtige Projet bedeelegt huet. An dobäi net ze vergiessen déi vill Verriederinnen a Verrieder vum Kultursektor selwer, déi reegelméisseg un den Assises culturelles bedeelegt sinn: Hiren Input huet och hei seng Friichte gedroen!

Merci fir d'Nolauschteren.

**Plusieurs voix | Très bien!**

**M. Mars Di Bartolomeo**, Président de séance | Merci och der Madamm Lorsché.

An éischten ageschriwwene Riedner ass den Här Georges Mischo. Här Mischo, Dir hutt d'Wuert.

### Discussion générale

**M. Georges Mischo** (CSV) | Merci, Här President. Här President, Dir Dammen an Dir Hären, mir ginn net just mat grouse Schrëtt op Chrëschttag an op d'Enn vum Joer 2022 zou, mee och, an dat wäert Iech elo net iwwerraschen, wann ech dat soen, op d'Enn vum Esch2022. Zéng Méint laang si ronn 160 Projekte mat Label an iwwer 2.000 Manifestatiounen an Events an deenen 19 Gemengen, 11 aus dem PRO-SUD an 8 aus dem franséische Grenzgebitt, gelaf.

Ech wëll hei elo weeder eiser Ofschlosszeremonie nach eisem definitive Bilan virgräifen, deen, mengen ech, awer absolutt positiv ass ... Dës zéng Méint

Esch2022 hunn Esch, awer och Diddeleng, Déifferdeng, Käerjeng, Beetebuerger, Suessem, Péiteng an all deenen aneren aus dem Süde vum Land, an iwwerhaapt Lëtzebuerg an de Leit, déi hei schaffen a wunnen, vill bruecht. An ech wëll dës Beispill vun Esch2022 sou stellverriedend fir déi ganz Kulturzeen bei eis am Land ernimmen.

Mäi Punkt ass, an dat wäit iwwer Esch2022 eraus: Kultur bréngt vill. Kultur gëtt vill. An dat nu wirklech net just a Chifferen, mee och a grad immateriell. Mee dës Vill-Bréngen a Vill-Ginn dierf net just e Sens unique sinn, et muss och e Retour aus der Gesellschaft a virun allem och aus der Politik kommen. Well Kultur ass definitiv kee Luxus, mee eng Liewensnoutwendegkeet, och fir e Land, fir eng Region, fir eng Gemeng a virun allem fir d'Biergerinnen an d'Bierger, an dat iwwerengs grad a Krisenzeiten, wou d'Kultur an d'Konscht fir d'Leit e Liichtbléck kënnen sinn an och scho waren.

Et ass awer esou, dass eis Kënschtler, eis Kulturschaffender, eis Leit, déi Kultur promovéieren an organiséieren, och Mëttele brauchen, fir dass Kultur funktionéiert, Mëttelen, also Suen, an eeben och Zäit. Well déi genannt Kulturprojete bei Esch2022 an awer och all déi aner Kulturprojete quéesch duerch d'Land, déi organiséieren sech net vum selwen, do gi vill Stonnen, Deeg, Wochen, jo, Méint a Joren drop. An dat ganz dacks an der Fräizäit vun eise Kulturleit hei zu Lëtzebuerg, déi zwar ganz dacks ganz professionell schaffen, awer nach laang net alleguer vun hire Kulturaktivitéiten liewe kënnen oder wëllen.

Dofir féiere mer haut erëm de Congé culturel mat dësem Projet de loi 7948 an, engem Projet, deen domadder och der Recommandatioun Nummer 28 aus dem Kulturentwécklungspang nokënnt. Mat dësem Congé culturel sollen déi Kulturschaffender erëm méi Zäit fir hir an och fir eis Kultur kréien. Ech ginn hei net op d'Detailler vum Projet an, dat huet d'Madamm Rapportrice, d'Madamm Josée Lorsché, elo ganz gutt a ganz detailléiert gemaach. An ech soen hir op dëser Plaz och villmools Merci fir hire mëndlechen a schrëftleche Rapport.

Fir all Spannung direkt ewechzehuelen: D'CSV wäert dës Neesaféierung vum Congé culturel mat Iwwerzeugung zustëmmen. Dës Congé ass jo 2014 quasi onbemerkt mat deem sougenannten Zukunftspak, dee jo eigentlech e Spuerpak war an ass, ofgeschafft ginn. D'CSV ass der Meinung: Do ass un där falscher Plaz gespuert ginn. An dat seet och zum Beispill d'Chambre des fonctionnaires an hirem Avis.

Agefouert ginn ass dee Congé jo fir d'éischt am Joer 1994. An dass dat eng richtig Decisioun war, weist éischts d'Neiintroductioun haut, mee och d'Bäibehale vum Esprit a vun de Grondprinzipien vum Congé culturel vun deemools. Vun 1995 bis 2014 hunn iwwerengs méi wéi 900 Demandé fir e Congé culturel en Avis favorable kritt. Méi wéi 1.400 goufen der agereecht. Et ass also deemools schonn eng kloer Demande fir dës Congé ginn. An et gëtt se ganz, ganz kloer och nach haut. Dat ass jo och bei deenen Diskussiounen ronderëm de KEP ganz kloer ginn.

Well, Dir Dammen an Dir Hären, Kultur brauch, wéi gesot, Zäit. A Kulturkreiatioun fällt net vum Himmel, si muss vun de Leit aus der Kulturzeen gemaach, promovéiert an organiséiert ginn. An och dës Leit brauchen dofir alleguer fräi Zäit. Si mussen, wéi jiddereen, dobäi hir Rechnungen bezuelen. A si hunn och en Urecht op e rekreative Congé – a kreativ ass nach laang net ëmmer rekreativ. Kultur berout ëmmer och op Aarbecht an Engagement an Asaz. Dofir ass deen neien „ale“ Congé culturel eng gutt Saach, an dat fir sämtlech artistesche Domänen, vun Arts



visuels a Multimedia iwwer Literatur a Musek bis hin zu Theater an Danz a villes méi.

Dëse Congé culturel ass e Win-win-Congé. Hie bréngt de Leit aus der Kultur méi Zäit, an och méi Unerkennung iwwregens. Hie bréngt awer och eis alleguer domadder eng besser a méi villfältig an och eng méi professionell Kultur, an dat am beschte Sënn vum Wuert.

Gläichzäiteg bedeit d'Gesetz awer och eng Stärkung vum Benevolat am Secteur culturel. An ouni Benevolat geet et och hei net. Net vun ongeféier ass d'Kapitel 13 aus dem KEP dofir och iwwerschriww mat „Valorisation du travail culturel et professionnalisation“.

De Congé soll jo dräi Kategorië vu Kulturleit zegutt-kommen: de kulturellen Acteuren, also deenen, déi d'Konscht schafen, si kréie mat dësem Gesetz bis zu zwielef Deeg Congé culturel pro Joer; de Verwaltungskaderen, also deenen, déi am Backoffice vun der Kultur schaffen; an och den designierte Persounen vun de Federatiounen, nationale Reseauen oder Vereenegungen aus dem kulturelle Secteur. Dëst ass eng nei Kategorie, déi an de Genoss vum Congé culturel soll kommen. Dat och, fir der Weiterentwicklung vun der Kulturzeen hei am Land Rechnung ze droen, mam Zil, fir konkret méi Zäit ze hunn, fir u kulturelle Manifestatiounen deelzehuelen, grad och am Ausland, an och fir kulturell Weiterbildung. Sou solle méi Leit heiheim an dobaussen Zougang zur Lëtzebuerger artistescher Kreatioun kréien a sou sollen d'Konscht-beruffer revaloriséiert ginn.

Da soll de Congé culturel och nach méiglechst flexibel gestalt kënne ginn, wat jo och wichteg ass an enger Zäit, déi iwwerhaapt ëmmer manner statesch ass. An d'Kultur ass do keng Ausnam, mee si ass bei neien Evolutiounen jo meeschtens mat virbäi.

D'Madamm Rapportrice huet et scho gesot, fir dëse Congé culturel erëm anzeféieren, ännere mer de Code du travail, also d'Aarbechtsrecht, an och d'Gesetz iwwer de Statut vum Staatsbeamte grad wéi och de Statut vun de Gemengebeamten. An dat bréngt mech och bei déi puer Kritikpunkten, déi ech trotz mengem positive Grondmessage awer wëll a muss lassginn.

Well obschonn de Projet haut besser ass wéi beim Depot am Januar – an dat ass virun allem der Aarbecht an den Opposition-formellë vum Staatsrot ze verdanken –, sou bleift d'Gesetz dach awer deelweis onkloer an onprezis, an dat trotz enger komparativer Etüd iwwer d'Spezialcongéen am Virfeld.

Grad wann et ëm d'Aarbechtsrecht geet, ass et nämlech wichteg, kloer a prezis an och fir jiddweree verständlech ze sinn. An dat vermësse mir als CSV, och wann déi gréissten Insécurité juridiques duerch d'Interventioun vum Staatsrot, wéi gesot, erausgeholl gi sinn. Ech denken hei zum Beispill un de Begrëff „manifestation culturelle de haut niveau“. Hei hu mir jo lo méi Präzisiounen an och eng Lëscht vun Typen vu sou Manifestatiounen. Mee och d'Chambre des Salariés huet an hirem Avis méi Präzisiounen verlaangt, grad och wat d'Modalitéite vum Congé culturel an den Artikelen L. 234-13 bis 19 ugeet.

Wichteg ass och de Rappel vum Staatsrot, datt mir eis beim Congé an enger Matière réservée à la loi laut Artikel 11 (5) vun eiser Verfassung beweegen. „La loi garantit le droit au travail et l'État veille à assurer à chaque citoyen l'exercice de ce droit“, heescht et do (veuillez lire: heescht et am Artikel 11 (4)). Dofir muss dann och de Gesetzgeber ganz besonnesch prezis sinn, wann et ëm den Droit du travail am Allgemenen a Congéen am Spezielle geet. Dat selwecht gëllt och fir d'Égalité devant la loi, wat jo grad am Kulturberäich besonnesch wichteg ass.

Net just op der Form – déi awer och hei als Manque de clarté kritiséiert gëtt –, mee och um Fong méi kritesch waren d'Chambre de Commerce an och d'Chambre des Métiers an hirem gemeinsamen Avis. Si schwätze sech souguer géint d'Opportunitéit vun engem neie Congé culturel aus.

Mir sinn do awer anerer Meenung. Nach muss een awer d'Remarke grad vu méi klengen a mëttleren Entreprises eescht huelen, well et ass net ëmmer einfach fir e kleng Patron, fir méi Congé vu senger Leit ze kompenséieren. Wichteg ass et hei, fir den Dialog grad mat de PME weider ze sichen an och fir méi Transparenz bei der Informatioun ze suergen, wat d'Decisiounen iwwer de Congé ugeet, soudatt jidder-een dat anstänneg aplange kann.

Den Text ass also eng Saach, mee et wäert virun allem op d'Praxis vum Text op allen Niveauen ukommen.

Här President, Dir Dammen an Dir Hären, am Resümee: Mir hunn zwar nach ëmmer e gewëssene Flou artistique an dësem Gesetz, an deen ass jo och vläicht gutt a Konscht an a Kultur, mee sécher net an engem Gesetz. Trotzdeem iwwerweien d'Avantage vum Congé culturel fir d'Leit aus der Kulturzeen an och fir eist Land, seng Regiounen, seng Gemengen a virun allem seng Leit. Well um Enn vum Dag bréngt dëst Gesetz méi Zäit fir Kultur, méi Zäit an och méi Reflexioun fir eis selwer. Et ass e kloer Réckwand fir eis Kultur hei am Land a fir allegueren d'Leit, déi an der a ronderëm d'Kultur aktiv sinn, an domadder e kloer Réckwand fir Land a Leit.

Mir wäerten trotz de genannte Kriticken als CSV-Fraktioun dësem Gesetz eis Ënnerstützung ginn. Ech soen Iech Merci fir d'Nolauschtenen.

**Plusieurs voix** | Très bien!

**M. Mars Di Bartolomeo**, Président de séance | Merci och. Den nächsten geschriwwene Riedner ass den Här André Bauler. Här Bauler, Dir hutt d'Wuert.

**M. André Bauler** (DP) | Merci, Här President. Fir datt ech et vun Ufank un net vergiessen, wëll ech der Madamm Josée Lorsché härelech Merci soe fir hir zwee Rapporten, dee schréftlechen an dee mündlechen, zu engem dach ganz wichtege Projet, deem vun der Neesaféierung an Erweiderung vum Congé culturel.

Jo, Kultur ass fir vill Leit net nëmmen an Engagement oder eng Fräizäitbeschäftegung, et ass och a grad eng Härzensugeleeenheet, et ass eng Passioun, et ass eppes, dat si an hirem Liewen erfëllt an hinnen nei Dimensiounen opmécht, där materieller, awer och a grad där immaterieller. Eppes, dat eis all iwwer den Alldag eraus dréit, eis an aner Sphäre kann erhiewen, eis nodenken a reflektéieren deet.

De Congé culturel ass eng Hëllef fir all déi Leit, déi opgrond vun hiren artistesche Qualitéiten e wäertvolle Bäitrag zur Kulturzeen vum Land bäidroen an och a grad international ënnerwee sinn.

Wat ech un dësem Gesetzesprojet gutt fannen – an och meng Fraktioun –, dat ass, datt ugestriift gëtt, fir déi finanziell Ressourcen, déi fir dëse Congé verfügbar sinn, verstänneg a verantwortlech ze notzen. Et soll also, wéi och am Rapport ze liese steet, keen eng sechst bezuelte Congéswoch kréien. Et soll där keng sinn, also fir all déi, déi mengen, si misste weinst iergendengem sporadesche kulturellen Engagement belount oder entlaascht ginn. Mëssbräich sollen also vermidde ginn. An dofir gëlle jo dann och zimmlech strikt Modalitéiten, zum Beispill och déi, datt déi betraffe Kulturschaffend, déi dat „à titre accessoire“ maa-chen, op Manifestatiounen vun héijem Niveau ageluede gi sinn.

Jo, meng Fraktioun ass zefridden, datt de Congé culturel ënnert dëser Form nees agefouert gëtt, well

dës Formule suergt fir eng responsabel Gestéioun vun de budgetäre Mëttel a gläichzäiteg ënnerstëtzt se déi Artisten, déi sech auszeechnen duerch hire reegelméisseg, héichwäertegen Engagement, hir Reputatioun, hir Professionalitéit an d'Unerkennung, déi si duerch d'Kulturzeen kritt hu respektiv kréien. A si ënnerstëtzt och déi Leit, déi an de Federatiounen an an de Veräiner reegelméisseg a benevoll schaffen an déi hëllef, Projekte mat op d'Been ze setzen, déi allgemeng zu enger Beliewung, enger Diversifizierung an enger Entwécklung vun der nationaler Kulturzeen bäidroen, dat an engem professionelle Kader.

D'Madamm Lorsché, d'Madamm Rapportrice, schreift an hirem schréftlechen Deel Follgendes, ech dierf si gären zitieren: „Afin d'éviter que les acteurs culturels n'en profitent pour poursuivre leurs activités de loisir sans devoir prendre de congé de récréation, comme cela a pu être constaté sous le régime de la Loi de 1994, le dispositif du congé culturel s'adressera désormais aux acteurs culturels qui exercent leur discipline ou leur art à titre accessoire, mais de façon à pouvoir participer à des manifestations de haut niveau organisées dans un cadre professionnel.“ Enn vum Zitat. Den Niewesaz, ech zitieren: „comme cela a pu être constaté sous le régime de la Loi de 1994“, huet mech e bëssen interpelléiert. D'Madamm Minister kann eis vläicht herno unhand vun e puer Beispiller illustréieren, wéi an der Zäit – sollt si et méi plastesch kënnen duerstellen –, am Kader also vum ale Gesetz aus dem Congé culturel en net vun de Pappe vum Gesetz ugestrieffen Erhuelungscongé ginn ass.

De Congé culturel, dat wësse mer, soll jo nämlech, dat wëlle mer jo mat dësem Gesetz, d'Förderung vun Talenter an diverse Beräicher ustriewen, déi hirer artistescher Tätegkeet noginn, ouni datt dat onbedéngt hiren Hauptberuff ass. Dat ass jo eigentlech de Sënn, de Geescht vun dësem Gesetz. Mam Congé culturel geet et also drëms, fir et den Artisten, déi an exigente Prestatiounen involvéiert sinn, ze erlaben, e Gläichgewicht ze fannen tëschent engersäits hirem Beruff an anerersäits der Ausübung vun hirer Konscht, beziehungsweise hinnen et ze erlaben, en erlichterten Iwwergang ze fannen um Wee hin zu enger Professionalisierung als Kënschtler oder als Kënschtlerin.

Ma et geet doriwwer eraus och drëm, fir, an dat ass dat Schéint un dësem Gesetz, de Benevolat am Kultursektor ze stärken. Well kommt, mir sinn éierlech: Et gëtt fir d'Veräiner, fir d'Verbänn, d'Federatiounen ëmmer méi schwéier a komplizéiert, engagéiert a fräiwëlleg schaffend Leit ze fannen, déi dës Aufgaben nieft hirem Beruff leeschten. Gëschter war jo bekanntlech den internationalen Dag vun der Fräiwëllegkeet, dem Benevolat, a grad och deen Dag ass déi do Thematik nach eng Kéier opgegraff ginn. Also all deene Benevolle gëllt jiddefalls eise Respekt an eis Unerkennung, well si Sailen am alideeglechen an organisatoresche Fonctionnement vun eise kulturelle Liewe sinn!

Dat gesot, hunn ech nach zwou Saachen. Éischters wollt ech soen: Merci fir Är Opmierksamkeet a merci der Rapportrice nach eemol fir dee gudden Bericht. Ech géif dann och den Accord vun eiser Fraktioun ginn.

An ech wëilt, Här President, dës Ried schlëssen, andeems ech Iech mat op de Wee wëilt ginn, datt et ferm heibannen op verschidde Plazen zitt an ee sech emol kéint erkalen, soudatt een en Donneschdeg vläicht net kéint heihinnerkommen, well ee sech eeben e Schnapp oder en Houscht oder Gott weess wat geholl huet. Merci, Här President, wann Der der-fir ...

**Plusieurs voix** | Très bien!



**M. André Bauler** (DP) | ... suergt, datt et e bësse méi waarm heibanne gëtt.

**M. Dan Kersch** (LSAP) | Da maacht et wéi ech, ech si mer e Pullover kafe gaangen.

(*Interruption*)

**Mme Cécile Hemmen** (LSAP) | Très bien! Très bien, Här ...

**M. Mars Di Bartolomeo**, Président de séance | Also ech hunn elo zwou Méiglechkeeten: entweder de Kolleegeen ze soen, si solle vläicht fir e bësse manner Zuch suergen, oder ee vun Äre fréiere Kolleegeen ze zitéieren, dee gefrot gi war, wat een an der Energiekris sollt maachen. Dat war sengerzäit de Josy Barthel, an den hat gemengt: „Kaaft Iech e laange ‚Kaulzong!’“

(*Hilarité et interruptions*)

**Mme Octavie Modert** (CSV) | Macht einfach d’Kli-maanlag aus!

**M. Mars Di Bartolomeo**, Président de séance | Jo, an e Schal. Fräi nom Josy Barthel: „An e Schal.“

An d’Wuert huet elo d’Madamm Simone Asselborn-Bintz. Madamm Asselborn-Bintz, Dir hutt d’Wuert.

**Mme Simone Asselborn-Bintz** (LSAP) | Ouni Schal an ouni Kalzong. Mee et zitt effektiv. Ech kann dat awer bestätegen, déi Sait zitt et wierklech.

(*Brouhaha*)

**Une voix** | Et zitt wéi an enger Häll.

**Mme Simone Asselborn-Bintz** (LSAP) | Här President, léif Kolleegeinnen a Kolleegeen, am Joer 2005 hunn ech no 20 Joer erëm op en Neits mam Lycée Hubert Clément zu Esch Theater gespilt. Den Alex Reuter, deemools Professor an Initiator vun der Theatertrupp, huet e Stéck initiéiert an och opgefouert mat der Trupp, wou en d’Rolle vun Erwuessenen och vun Erwuessene wollt spille loossen. Et war keen anert Stéck wéi d’„Resistenz“, wat iwwert den Zweete Weltkrich gehandelt huet. Dat Stéck, dat war deemools e groussen Erfolleg an d’Groussherzoglech Koppel war och souguer present bei enger Opféierung. An den deemolege Staatsminister Jean-Claude Juncker huet ugefrot, dass mer nieft der Lycéesvirstellung nach eemol an der Stad dat Stéck sollten opféieren, an zwar am Kader vun der Commemoriatioun fir de 60. Anniversaire vun der Libératioun, der Rundstedt-Offensiv an dem Enn vum Krich.

Ech weess, dass et do net einfach war fir eis Erwuessen, Congé culturel unzefroen, a mir haten dach awer och e puer Leit, déi do la léiwier einfach Congé geholl hunn, amplaz vun dësem Moyén Gebrauch ze maachen. Ech och selwer hu mer och zweemol iwwerluecht, ob ech vum Congé culturel wéilt profitéieren, well ech hätt dach awer relativ wéineg Deeg, déi ech a menger ganzer Karriär hätt kënnen huelen, zegutt gehat an ech wouss jo net, ob ech géif da weider eng Theaterkarriär aschloen. Ok, ech hu mech dann och éischter fir d’Politik entscheet. Ech hätt se net méi gebraucht.

**Une voix** | Dat ass och Theater!

**Mme Simone Asselborn-Bintz** (LSAP) | Et ass vläicht heiansdo och änlech, jo. Voilà!

(*Interruptions*)

Mat dësem Gesetzesprojekt, Dir Dammen an Dir Hären, féiere mer dann elo de Congé culturel erëm zu Lëtzebuerg an, sou wéi dat dann och am KEP bei der Recommandatioun Nummer 28 steet a wéi et och vun de Kulturschafende gefrot ginn ass. An dat ass schonn e puermol haut gesot ginn.

De Grondprinzip an d’iewesch Zil vum neie Congé culturel hunn natierlech net changéiert: Weeder de

Konschtschafende selwer nach säi Patron dierfen e finanziellen Nodeel erliewe mussen, well de Konschtschafenden zu kulturelle Manifestatiounen op héijem Niveau, wéi zum Beispill Festivalen, Biennallen oder Theaterproduktiounen, invitéiert gëtt.

Andeems mer also d’Participatioun u kulturelle Manifestatiounen op héijem Niveau erliichten, droe mer entscheidend zur Professionaliséierung vun der Lëtzeburger Kulturzeen bäi, well eis kulturell Acteure kënnen sech nëmmen da weiderentwéckelen, wa se och dierfen op kulturelle Manifestatiounen mat aneren Expressiounen an Expressiounsformen a Kontakt kommen. An dat ass och schonn haut, mengen ech, genuch gesot ginn.

Et ass allerdéngs net esou, wéi wa mer erëm einfach géifen deen alen Dispositif, dee mer jo Enn 2014 am Kader vum Zukunftspak ofgeschafft hunn, recycléieren. Au contraire! Mam neie Congé culturel féiere mer méi selektiv Krittäre mat enger rigoureser Prozedur an, fir awer och sécherzestellen, dass de Congé culturel nëmmen da kann an Usproch geholl ginn, wann en och wierklech gebraucht gëtt. Mir hu jo awer aus den Erfarunge vum fréiere Gesetz vum 1994 och geléiert.

Mir hunn och par rapport zum alen Dispositif nei Kategorië vu Beneficiairë bäigesat, fir der Diversitéit vun der Lëtzeburger Kulturzeen besser Rechnung ze droen. An Zukunft wäerten dann och administrativ Kadere vum Congé culturel profitéiere kënnen, grad esou wéi Representantë vu kulturelle Federatiounen an Associatiounen. Déi Neierung wäert virun allem d’Aarbecht vun de sëllege Benevollen och valoriséieren, déi zum Succès vun engem kulturelle Projet bäidroen. Dëst ass fir mech a meng Partei och e ganz wichtige Punkt bei dësem Gesetzesprojekt.

De Congé culturel kann an Usproch geholl ginn an der Phas vun der Preparatioun, der Kreatioun, der Exekutioun respektiv och nach der Diffusioun an der Promotioun vum jeeweilege Projet. Et ass effektiv eng wichteg Präzisioun am Gesetzestext, dass de Congé culturel an alle successive Phase vun engem kulturelle Projet däréi genotzt ginn.

Ech begréissen och, dass mam neie Congé culturel d’Deeg, déi ee ka fräigestallt ginn, pro Joer gekuckt ginn an net méi op d’Längt vun enger professioneller Karriär. Dëst gëtt de kulturellen Acteuren da méi Previsibilitéit an hiren Organisatiounen.

Et gëtt also vill Grënn, fir dësem Gesetzestext hei zou-estëmmen. D’Reform vum Congé culturel reit sech dann och an d’Logik vun den aneren Texten an, déi mer haut de Mëtten an der Chamber hei stëmmen oder scho gestëmmt hunn. Et ass eng Logik vun der Unerkennung vun der Bedeitung vun der Kultur fir eis Gesellschaft als Ganzes a fir jiddwer Eenzelne vun eis, egal ob mer a priori eng Affinitéit zur Kultur mengen ze hunn oder och net.

Ech ginn dofir och zu dësem Projet ganz gären den Accord am Numm vun der LSAP-Fraktioun a soen dës Kéier der Rapportrice Josée Lorsché Merci fir déi zwee Rapporten. An ech wéilt ofschléisse mat engem afrikanesche Spréchwuert, dat seet: „E Mënsch ouni Kultur änelt engem Zeebra ouni Sträifen.“

Ech soen Iech Merci fir d’Nolauschteren.

(*Hilarité et interruptions*)

**M. Mars Di Bartolomeo**, Président de séance | Merci. Ech hu mäi Pulver all scho verschoss, dofir soen ech näischt a ginn d’Wuert direkt weider un den Här Fred Keup.

**M. Fred Keup** (ADR) | Merci, Här President. Léif Kolleegeen, Dir Dammen an Dir Hären, ech wäert mech

och ganz kuerz faassen, well ech mengen, et ass scho ganz viles hei gesot ginn, wat ganz richteg ass. Prinzipiell ënnerstëtze mir dat heite jo och a mir wäerten och als ADR eisen Accord ginn.

Ech wëll awer trotzdem hei drop opmierksam maachen, dass och an den Avisen dee Projet hei dach awer trotzdem contestéiert war. An dat eeben och wéinst der Héicht vun de Congéen, wou d’Handelskummer, d’Handwerkerkummer an och de Syvicol awer hir Bedenken ugemellt hunn a besonnesch och d’Handelskummer am Fong vehement dergéint war, well se eebe fäert, dass duerno gewässeremoossen ze vill Congé dropgeet oder eventuell en Abus gemaach gëtt an dass dat dann natierlech fir si an hir Entreprisen eventuell kéint schwierig ginn. D’autant plus, well et jo och nach aner Méiglechkeete vu Congé gëtt, well och iwwer en eventuelle Sportscongé geschwat gëtt, deen änlech kéint si wéi elo hei de kulturelle Congé.

Mir sinn op jiddwer Fall awer derfir. Et ass awer d’Fro, mir hunn elo hei e Gesetz, dat ass d’Theorie, an d’Fro ass am Fong: Wéi gëtt dat duerno genee an der Praxis ëmgesat? Dat heescht: Wéi vill Leit wäerten dann och wéi vill Deeg an der Realitéit dovunner profitéiere kënnen? Dat ass jo awer eng grouss Fro.

An deem Sënn hu mer elo hei, fir dat feststellen, och eng Motioun preparéiert, wou mer géife virschloen, fir an zwee Joer eng Kéier eng Evaluatioun vun dësem Gesetz a senger praktescher Ëmsetzung ze maachen, eebe grad, fir och deene Bedenke vun der Handelskummer, vun der Handwerkerkummer a vum Syvicol gerecht ze ginn.

Ech soen Iech Merci.

## Motion 1

*D’Chamber vun den Deputéierten*

*stellt fest, datt*

– *de Projet de loi 7948 iwwert de Congé culturel, deen haut vun der Chamber vun den Deputéierte gestëmmt gouf, virgesäit, datt an Zukunft d’Acteurs culturels pro Joer a pro Kapp op zwoelf Deeg Congé culturel zrëckgräife kënnen,*

*ass sech bewosst, datt*

– *géint dës Bestëmmung vum Projet de loi 7948 Kritik vu verschiddene Säiten ervirbruecht gouf, sou zum Beispill vun der Handelskummer, der Handwerkerkummer a vum Syvicol,*

*fuerdert d’Regierung op,*

– *no zwee Joer eng Evaluatioun vun dësem Gesetz am Hibleck op seng praktesch Ëmsetzung ze realiséieren.*

(s.) Fred Keup.

**M. Fernand Kartheiser** (ADR) | Très bien!

**M. Mars Di Bartolomeo**, Président de séance | Merci och. An ech gesinn, d’Madamm Nathalie Oberweis ass scho prett. Dir hutt d’Wuert.

**Mme Nathalie Oberweis** (déi Lénk) | Merci, Här President. Merci och nach eng Kéier der Rapportrice fir hire Rapport. An och mir begréissen dës wichteg Initiativ, d’Méiglechkeet vum Congé culturel erëm anzeféieren an auszeweiten. Leider ass dee Congé, deen 1994 agefouert gouf an duerchaus seng Meritten hat, 2014 dem Spuerpak vun der Regierung zum Affer gefall. Déi blo-rout-gréng Regierung féiert elo also nees eppes an, wat se virun aacht Joer ofgeschaf hat. Mir als Lénk begréisse ganz kloer, datt d’Regierung hei eng 180-Grad-Kéier mécht mam Erëmaféiere vum Congé culturel. Mir haten dësen och an eisem Walprogramm stoen.



De Congé culturel ass immens wichtig, well e justement e Jarnéier ka sinn zur Professionaliséierung vum Kultursektor, an dat ass jo, mengen ech, och zum Deel d'Zil vun dësem Gesetz. Et ka wéi eng Bréck funktionéieren tëscht enger usprochsvoller Konscht op héijem Niveau, déi nach net haaptberufflech ausgeübt gëtt, an dem nächste Schrëtt zum Haaptberuff. Doranner kann de Congé culturel e Baustee sinn, an dat ass gutt esou, wa mer wëllen d'Kënschtler ënnerstëtzen an hirem Wierken.

Mee ech muss awer och ee Bedenke vu mir ausdrécken, an zwar, dass ech mech ëmmer nach froen, wat dann „de haut niveau“ bedeit. Well wa mer Kultur demokratesch uginn, da fannen ech et schwierig ze soen, dass een oder eng Instanz d'Soen huet, wat dann elo „culture de haut niveau“ ass. Mir vun déi Lénk géifen eis wënschen, dass jiddweree méi Zäit hätt, fir sech kënschtlersche ze expriméieren, an dofir hu mir jo eis Propos zur Aarbechtszäitverkürzung. Mee dat ass elo en anert Thema.

Gutt ass déi nei Flexibilitéit an dem Modell vum Congé culturel. De Congé culturel kann elo bis zu zwielef Deeg pro Joer geholl ginn a kann och fraktionéiert ginn an hallef Deeg. Mir begrëssen och d'Aféierung vun neie Kategorië vu méigleche Beneficiairen, déi der Entwécklung vun der kultureller Produktioun Rechnung droen, gradesou wéi d'Méiglechkeet fir d'administrativ Kadere vu Federatiounen oder Associatiounen, dës Congé kënnen unzefroen.

E grouse Fortschrëtt par rapport zum Gesetz vun 1994 ass och d'Tatsaach, dass elo net méi d'Residenz zielt, mee d'Affiliatioun vun der Sécurité sociale. Effektiv wier dës Residenzklausel virum Hannergrond vun den Urteeler vum Europäesche Geriichtshaff net méi drobar gewiescht a virum allem och net gerecht. An et ass jo d'Aarbecht, déi Rechter opmécht, an net déi Plaz, wou ee wunnt.

Am Resümee: E gudder Projet, dee Léieren aus dem Gesetz vun 1994 zitt an ugepasst ass an dëser Wirklechkeet och Rechnung dréit. Dofir ass et ëmsou méi onverständlech, firwat d'Regierung dëst Gesetz 2014 ofgeschaf huet.

Ech soen Iech Merci fir d'Nolauschteren.

**M. Mars Di Bartolomeo**, Président de séance | Merci och. An de leschten ageschriwwene Riedner ass den Här Marc Goergen.

**M. Marc Goergen** (Piraten) | Merci, Här President. Merci dem Josée Lorsché fir dee schrëftlechen a mündleche Rapport. A well ech virdru gefrot gi sinn: Nee, de Sven ass net krank, en ass op enger Missioun fir d'Chamber, dofir. Ok ...

**Plusieurs voix** | O!

(Interruptions)

**M. Marc Goergen** (Piraten) | Mir stëmmen natierlech de Projet mat. Merci.

(Interruptions et hilarité)

**M. Mars Di Bartolomeo**, Président de séance | Merci.

An eis Kulturministesch, d'Madamm Sam Tanson, ass prett.

**Prise de position du Gouvernement**

**Mme Sam Tanson**, Ministre de la Culture | Jo, Här President. Merci Iech alleguerten och hei nach eng Kéier fir Är Ënnerstëtzung! Dir hutt scho ganz vill am Detail gesot, wat elo hei alles erëm wäert méiglech sinn, dofir ginn ech natierlech elo net nach eng Kéier dorobber an. Ech wollt vläicht just nach e puer Remarque maachen. Dat eent ass, dass mer och hei erëm en Deel vun Demanden ëmsetzen, déi mer aus dem Sektore kruten. Dat ass d'Recommandatioun

Nummer 28 vum Kulturentwécklungsplang. Mir hatten och hei eng Consultation publique lancéiert, do krute mer allerdéngs net ganz vill Remarken a Proposen dozou eran.

Vläicht awer nach eng Kéier kuerz e Rappel, wat deen Text hei ass, an och, wat en eeben net ass. Et geet net drëm, quitta dass dat eng Iddi ass, déi natierlech charmant ass, mee déi vläicht iwwert deen heite Sektore erausgeet, et geet net drëm, einfach all Zort vu kultureller Tätegkeet, där een noheet, mat engem Congé ze kompenséieren. Et geet schonn drëm, fir et Artisten, déi op engem relativ héijem Niveau awer ënnerwee sinn, méiglech ze maachen, dass se eng Zäit fräigestallt ginn op hirer Aarbecht, fir dann deenen Tätegkeeten och nozegoen. Dat ass wirklech d'Zil. An et ass complémentaire eigentlech zum Statut vum Intermittent, geet och weider an d'Professionaliséierung vum Artist.

Et kann ee sech jo ganz gutt virstellen ... Ech mengen, d'Madamm Asselborn-Bintz huet virdrun erkläert, si hätt sech ee Moment nach d'Fro gestallt, ob se géif elo professionell Actrice ginn oder professionell Politiikerin – iwwert d'Ënnerscheeder vun deenen zwou Professionen, do kann ee warscheinlech laang philosophéieren –, mee dat ass eeben en typescht Beispill fir ze soen: Voilà, mir hu vill Artisten, bei deenen e groussen Deel vun hirer Aktivitéit aus deem Artistesche besteet an en aneren Deel besteet aus engem aneren Job. Dat sinn der oft och am kënschtlersche Beräich.

Dat Beispill, wat jo ëmmer erëm virkënn, ass dat vum Museksproff, deen also seng Passioun esouwuel weidergëtt u Jonker, mee awer och vill Engagementer kann hunn op der Bün, wou en dann awer och muss fräigestallt kënnen ginn. An dat ass am Fong fir deen ee Vole, dee vun der Ënnerstëtzung vun de Kënschtler, dat, wat mer hei wëllen erreechen.

Wat awer och extreem wichtig ass, an dat ass och bei e puer vun de Riedner ugeklungen, ass dee Vole vum Benevolat.

(Brouhaha)

Mir hunn eng Situatioun, an dat ass natierlech vläicht e bëssen en traurege Constat, et ass schued, mir sinn net méi an enger Situatioun wéi vläicht nach virun e puer Joerzénge ...

(Brouhaha)

Et ass extreem vill Kaméidi heibannen, Här President! Ech weess net, ob dat un der spéider Stonn – hallwer siwen – läit oder um Sujet.

**M. Mars Di Bartolomeo**, Président de séance | Also, et huet just een d'Wuert ...

**Mme Sam Tanson**, Ministre de la Culture | O, wéi léif!

**M. Mars Di Bartolomeo**, Président de séance | ... hei am Haus, an dat ass eis Kulturministesch.

**Mme Sam Tanson**, Ministre de la Culture | Merci!

**M. Mars Di Bartolomeo**, Président de séance | Sou, wannechgelift, also e bësse manner Gegrommels!

**Mme Sam Tanson**, Ministre de la Culture | Jo, ech sinn och ganz séier fäerdeg. An nach méi séier, wann ech mech ka konzentréieren op dat, wat ech wëll soen.

An dat anert ass dee Vole vum Benevolat. Mir constatéieren a ganz ville Sektoren, dass et ëmmer méi schwierig gëtt, Leit ze fannen, déi nach déi néideg Zäit hunn, fir sech niewent hirer Aarbecht benevöll ze engagéieren. An dat ass eppes, dat musse mer honoréieren. Mir mussen dat an alle Sektore maachen. An hei ass eeben déi Etapp, déi mer maachen am

kulturelle Beräich, dat ass déi grouss Neierung am Fong vun deem heite Revival vun dem Congé culturel. An do sinn eebe wirklech déi zwee Niveauen, déi mer wëllen ënnerstëtzen: op där enger Säit déi Persounen, déi vun de Federatiounen an Associatiounen aus dem Kultursektor bestëmmt ginn, an op där anerer Säit d'Cadres administratifs.

Domat wäert sécherlech net all deen Engagement, dee se hunn, kompenséiert ginn duerch Congé op hirer Aarbechtsplaz, mee et ass wéinstens en Zeechen. Et ass, fir hinnen ze soen: „Mir honoréieren dat“, a fir vläicht engem Deel vun deem, wat do u ganz ville Stonnen dropgeet, fir sech an deenen eenzelne Veräiner, Federatiounen ze engagéieren, fir deem e bëssen entgéintzekommen.

Voilà! Ech soen Iech Merci fir d'Ënnerstëtzung a bis da geschwé fir dee leschte Projet.

**M. Mars Di Bartolomeo**, Président de séance | Merci och. Ech mengen, d'Madamm Octavie Modert wollt nach eng Fro ...?

**Mme Octavie Modert** (CSV) | Jo, merci, Här President, et ass Parole après ministre, mee effektiv net Parole „à la“ ministre, well ech wollt hir net virgräifen op déi Fro, déi den Här Bauler gestallt hat: wat dat da gewiescht wär, wéi et am Rapport steet. Ech kann Iech just soen, dass eng vu mengen éischten Aktiounen, wéi ech an de Kulturministère komm sinn, war, fir e Congé culturel net ze ginn u Leit, déi op eng ganz bekannt Croisière géife goen. An et sinn och nach aner Beispiller, déi nogefollegt sinn – dat huet mer ganz vill Sympathien abruecht ... –, an dat ass d'Ursaach méiglecherweis. Dat steet also falsch am Rapport dran. Ech weess, dass ech vun Iech keng Unerkennung kréien, mee e bëssi Objektivitéit ass natierlech awer och méiglech!

Merci.

**M. Dan Kersch** (LSAP) | Den Ufank war gutt.

(Interruptions et brouhaha)

**Mme Octavie Modert** (CSV) | O jo, du kanns dech och emol eng Kéier zrëckhalen ...

(Hilarité)

**M. Mars Di Bartolomeo**, Président de séance | Sou, ech mengen, ech loosse d'Diskussiounen elo net méi lafen. Et ass zwar gutt, dass mer en Debat hei am Haus hunn, ...

(Brouhaha général)

... mee ech géif mengen, mir sollten elo zur Ofstëmmung iwwergoen. An ech ginn dervun aus, dass mer do erëm eng ganz grouss Gemeinschaft, Unitéit wäerte fannen.

**Vote sur l'ensemble du projet de loi 7948**

D'Ofstëmmung fänkt un. Fir d'éischt déi perséinlech Stëmmen. Dann d'Procuratiounen. D'Ofstëmmung ass elo eriwuer.

Jo, an: Unanimitéit.

**Une voix** | A!

**M. Mars Di Bartolomeo**, Président de séance | Voilà, et soll nach ee soen, mir géifen hei streiden.

(Hilarité)

Ont voté oui : Mmes Diane Adehm, Nancy Arendt épouse Kemp (par M. Laurent Mosar), MM. Emile Eicher, Félix Eischen (par Mme Diane Adehm), Paul Galles (par M. Jean-Marie Halsdorf), Léon Gloden, Jean-Marie Halsdorf, Mme Martine Hansen, MM. Max Hengel, Aly Kaes, Marc Lies, Mme Elisabeth Margue, M. Georges Mischo, Mme Octavie Modert, MM. Laurent Mosar, Gilles



Roth, Jean-Paul Schaaf, Marc Spautz, Serge Wilmes, Claude Wiseler (par Mme Elisabeth Margue) et Michel Wolter ;

MM. Guy Arendt, André Bauler, Gilles Baum (par M. André Bauler), Mme Simone Beissel, MM. Frank Colabianchi, Fernand Etgen (par M. Gusty Graas), Gusty Graas, Max Hahn, Mme Carole Hartmann, MM. Pim Knaff (par M. Frank Colabianchi), Claude Lamberty et Mme Lydie Polfer ;

Mme Simone Asselborn-Bintz, M. Dan Biancalana (par M. Yves Cruchten), Mmes Tess Burton, Francine Closener, MM. Yves Cruchten, Mars Di Bartolomeo, Mme Cécile Hemmen, M. Dan Kersch, Mme Lydia Mutsch et M. Carlo Weber ;

Mme Semiray Ahmedova, M. François Benoy, Mmes Djuna Bernard, Stéphanie Empain, Chantal Gary, M. Marc Hansen, Mme Josée Lorsché, M. Charles Margue et Mme Jessie Thill ;

MM. Jeff Engelen, Fernand Kartheiser, Fred Keup et Roy Reding (par M. Fernand Kartheiser) ;

MM. Sven Clement (par M. Marc Goergen) et Marc Goergen ;

Mmes Myriam Cecchetti et Nathalie Oberweis.

Dat gesot, gi mer da lues awer sécher zu deem leschte Punkt vun eise ...

**Plusieurs voix** | D'Motioun!

**M. Mars Di Bartolomeo**, Président de séance | A, d'Motioun! Entschëllegt, jo, Dir hutt Recht, d'Motioun nach.

### Motion 1

Wëllt nach ee Stellung zu der Motioun huelen? Madamm Lorsché.

**Mme Josée Lorsché** (déi gréng), rapportrice | Villmools merci, Här President. Et ass jo net fir d'éischt, dass mer e Gesetz evaluéieren, dat ass ganz kloer. Dat gëtt oft gefrot bei Gesetzter. Do soe mer och näischt dergéint. Mir sinn awer der Meenung, dass dräi Joer hei besser wären, well een dann awer méi Donnéeë virleien huet wéi direkt no zwee Joer. Et muss ee jo d'Entwécklung e bësse beobachten an dann e Bilan zéien. Dofir proposéiere mer, dräi Joer draus ze maachen.

Ech wëilt awer och nach eppes soen zum „ass sech bewusst, datt“: Do steet, dass kritiséiert ginn ass, dass just zwielf Deeg pro Persoun zougestane ginn. Ech hunn awer och am Rapport gesot, dass Ausname kënne gemaach ginn, si musse just schrëftlech motivéiert sinn. A wann d'Kommissioun dann der Meenung ass, dass déi zwielf Deeg net duerginn, an déi Persoun argumentéiert dat gutt, da kritt se déi och zougestanen. Vun dohier fanne mer dee Saz dach awer e bësse simplistes. Mee dat ass jo e bësse Är Manéier ze funktionéieren.

**Plusieurs voix** | O!

**Mme Josée Lorsché** (déi gréng), rapportrice | Vun dohier loosse mer en dann einfach stoen, wann dat Iech frou mécht. Mee als Géigepart gi mer dann awer gär op dräi Joer.

**M. Mars Di Bartolomeo**, Président de séance | D'Fro ass: Dräi Joer?

**M. Fred Keup** (ADR) | Jo!

**M. Mars Di Bartolomeo**, Président de séance | Respektiv déi Suggestioun ...? Här Keup.

**M. Fred Keup** (ADR) | Jo, ech géif natierlech dann d'accord sinn, fir et op dräi Joer ze erhéijen, well dat ass och ok.

A fir de Rescht: Jo, et hätt een nach kënne draschreien, dass och anerer méi gefuerdert hunn. Do wëll

ech mech deem och guer net verschléissen. Wa mer eis esou eens gi mat „dräi Joer“, dann: tipptopp!

**M. Mars Di Bartolomeo**, Président de séance | Jo. De Rescht, loosse mer deen esou stoen?

**Plusieurs voix** | Jo.

**M. Mars Di Bartolomeo**, Président de séance | Ok.

### Motion 1 modifiée

D'Chamber vun den Deputéierten

stellt fest, datt

– de Projet de loi 7948 iwwert de Congé culturel, deen haut vun der Chamber vun den Deputéierte gestëmmt gouf, virgesäit, datt an Zukunft d'Acteurs culturels pro Joer a pro Kapp op zwielf Deeg Congé culturel zrëckgräife kënnen,

ass sech bewusst, datt

– géint dës Bestëmmung vum Projet de loi 7948 Kritik vu verschiddene Säiten ervirbruecht gouf, sou zum Beispill vun der Handelskummer, der Handwierkerkummer a vum Syvicol,

fuerdert d'Regierung op,

– no dräi Joer eng Evaluatioun vun dësem Gesetz am Hibleck op seng praktesch Ëmsetzung ze realiséieren.

(s.) Fred Keup.

### Vote sur la motion 1 modifiée

Kann ech dervun ausgoen, dass déi Motioun vu jiddwerengem gedroen ass? En Handzeechen, wann ech gelift.

Wien ass dergéint?

Wien enthält sech?

Unanime hu mer also d'Motioun ugeholl. An no dräi Joer bilanzéiere mer.

### Dispense du second vote constitutionnel

Ier ech zum nächste Punkt iwwerginn, wëll ech nach just froen, ob mer d'Dispens vum zweete Vott froen.

(Assentiment)

**Mme Djuna Bernard** (déi gréng) | Jo, Här President.

## 14. 8011 – Projet de loi portant modification de la loi modifiée du 25 juin 2004 portant réorganisation des instituts culturels de l'État

**M. Mars Di Bartolomeo**, Président de séance | Merci der Madamm Bernard, an da ginn ech hir och direkt d'Wuert fir d'Presentatioun vun deem leschte Projet, dem Projet 8011. Madamm Bernard, Dir hutt d'Wuert.

### Rapport de la Commission de la Culture

**Mme Djuna Bernard** (déi gréng), rapportrice | Merci, Här President. Léif Kolleeginnen a Kolleegen, de 25. Februar 2022 hu mer heibannen d'Patrimoinegesetz gestëmmt. Deemools sinn ech als Rapportrice drop agaangen, wéi eng verschidden Dimensione vum Patrimoine culturel et gëtt – ech erënneren un de „patrimoine architectural“, den „archéologique“, de „mobilier“ an den „immobilier“. A wéi seet ee sou schéin: Wann een A seet, da muss een och B soen. An dowéinst adaptéiere mer haut de gesetzleche Kader vun den Instituter, déi sech ëm eise Patrimoine këmmen. Hir Verantwortung ass et, dëst Kulturierwen ze erfuerschen, ze dokumentéieren, et an en historiches Kontext ze setzen an natierlech och fir de Public accessibel ze maachen.

Wie sinn dann eigentlech déi sëllege Kulturinstituter, ëm déi et sech an dësem Gesetz handelt? Et sinn: d'Archiven, d'Nationalbibliothék, de Centre national

de l'audiovisuel, de Centre national de littérature, den INRA, Institut national de recherches archéologiques, den INPA, Institut national pour le patrimoine architectural, de Centre national ... – nee, deen hat ech, elo hunn ech schonn een ze vill gesot –, den Nationale Geschichts- a Konschtmusée an den Nationalen Naturmusée.

An de leschten 20 Joer, léif Kolleeginnen a Kolleegen, huet sech vill gedoen an eiser Kulturwelt an och, wann et ëm d'Kulturinstituter geet. D'budgetär Moyenen hunn evoluéiert, d'Missioun si méi villschichteg ginn an d'Aktivitéit sinn och méi breet opgestallt. Deementspriedend ass och d'Zuel vum Personal méi grouss wéi deemools.

Natierlech hunn och grouss kulturpolitesch Akzenter, wéi d'Kulturjoer 2007, d'Europäescht Joer vum Patrimoine 2018, d'Ratiofikatioun vun internationale Konventionen, hir Spueren an Impakter hannerlooss. An d'Roll vun eiser Fuerschung huet sech och verännert a si huet natierlech – an dat ass och gutt esou – en Afloss op d'Kulturinstituter, huele mer beispillsweis den Centre for Contemporary and Digital History, C<sup>2</sup>DH, oder den Institut de langue et de littératures luxembourgeoises, déi reegelméisseg op d'Instituter zrëckgräifen. An net zulescht, ech hunn et scho gesot, eist Patrimoinegesetz, dat mer de 25. Februar 2022 gestëmmt hunn, wat natierlech en direkten Impact op d'Aarbecht vun eisen Instituter huet, wéi beispillsweis d'Kreatioun vum INRA dëst Joer.

Här President, mat dëser Gesetzesännerung gëtt der Entwécklung vun de Kulturinstituter Rechnung gedroen an d'Fonctioun vun engem Directeur adjoint geschaaft. Och d'Missioun vun den Instituter goufen an dësem Gesetzestext klarifiéiert an eeben dese rezenten Entwécklungen ugepasst.

De Staatsrot huet a sengem éischten Avis zwou Opposition-formellen ausgeschwat, notament ronderëm d'Fro vum Dépôt légal bei der Nationalbibliothék a beim CNA. Dës konnten no de formulierten Amendement-parlementairen awer opgehewe ginn. Des Weidere krute mer just nach den Avis vun der Staatsbeamtekummer, déi hiren Accord zu dësem Projet ginn huet.

E klengen Iwwerbléck nach zu de Kommissiounsarbeiten: De Projet de loi gouf den 23. Mee 2022 vun der Kulturministesch Sam Tanson deposéiert. Den 19. Juli hu mer den Avis vum Staatsrot diskutéiert an ech gouf zur Rapportrice ernannt. An den 1. Dezember, also virun enger décker Woch, huet d'Kommissioun de schrëftleche Rapport zu dësem Gesetz ugeholl.

Ech wëll op dëser Plaz profitéieren, fir de Membre vun eiser Kulturkommissioun e grouse Merci ze soe fir eis konstruktiv Diskussiounskultur, déi mer an der Kommissioun hunn. Et ass eng Freed, mat Iech zesummenzeschaffen.

Ech ginn heimadder och den Accord vun der grénger Fraktioun. An éier ech ophalen, wëll ech Iech alleguerten invitéieren, wann Der e fräie Moment hutt an deenen nächste Wochen, vläicht iwwert d'Chrëschtvakanz, fir eis Kulturinstituter vu bannen ze entdecken an hir wichteg Aarbecht fir eist Kulturierwe besser kennenzeléieren.

E grouse Merci.

**Plusieurs voix** | Très bien!

**M. Mars Di Bartolomeo**, Président de séance | Merci villmools.

An éischt ageschriwwen Riednerin ass d'Madamm Elisabeth Margue.